



4. oktober 2012

Inatsisartut suleriaasianni § 37 naapertorlugu Naalakkersuisunut apeqqut imaattoq matumuuna saqqummiuppara.

**Ilulissat kangerluata kangiani ukiuunerani qimussimik aalisartartut immikkut pisassinneqarnissaat pinngitsoorneqarsinnaanngimmat Naalakkersuisut qimussimik Ilulissat kangianni aalisartunut pisassiiniarpaat?**

(Inatsisartuni ilaasortaq Hans Enoksen, Siumut)

**Tunnngavilersuut:**

Ukiaq manna Ilulissat aqutsiveqarfianni qaleralittassat nungulerput, aalisarneq unitsinneqattaarpoq massakkullu ukiorpassuarni qimussimik nungusaataanngilluinnartumik Ilulissat kangianni aalisartarsimasut periarfissaarutivipput. Tassami Ilulissani qimussertartut oktober-ip ingerlanerani tatsit sikunissaat utaqqinnartarpaat aalisariarniarlutik kangianut.

Taava massakut aatsaat aalisarneq 1. november 2012 aallarteqqissaaq 50 tonsiinnaallu pisarineqartussaallutik aamma taamatorluinnaq ippoq Juullip qaammataani tassuunaannarluunnit ersersinneqarpoq qimussimik aalisariarnissaq periarfissaarulluinnartinneqartoq tamannalu qimussimik aalisartartut eqqarsaatigalugit illersorneqarsinnaanngivippoq.

Ukiorpassuarni qimussimik aalisariartarneq ingerlanneqartuatarsimavoq ilaqutariiaanut pilersuinermi sunniuteqarluinnartoq. Taamaattumik massakut mattussilluinnarneq ilaqutariinnut qimussimik ukiuunerani aalisarnermik inuussutissarsiuuteqalartartunut annertoorujussuarmik eqquinerluttussaavoq sorpassuarnut. Ilaqutariit pissaqarniarnikkut aammalu akiligassaminnik malinnaaniarnermikkut ajorluinnartumik eqqorneqartussanngorput akuerineqarsinnaanngitsumik.

Taamaattumik pissutsit ilungersunareersut qaavatigut suli ilungersunarnerulersitsineq akuerineqarsinnaanngivimmat pisassiissoqartariaqarluinnarpoq.

Apeqqutima ullut qulit iluanni akineqarnissaat qinnutigaara.